

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

1. मुख्यमंत्री उमर अब्दुल्ला होरें सामागम 2025 दे उद्घाटन मौकेख अंगदान बारे बड्डे पैमाने पर जागरूकता ते सैहयोग पर जोर दित्ता।
2. उमर अब्दुल्ला होरें श्रीनगर च के2के-ई-वाहन ड्राइव गी झंडी दस्सियै रवाना कीता।
3. यूटी कैबिनेट नै 3 मार्च गी विधानसभा च उपराज्यपाल हुंदे अभिभाषण दी मजूरी दित्ती।
4. जम्मू कश्मीर च पंचैतें दे चुनां अप्रैल मई महीने च करोआए जाई सकदे न।
5. समूलचे जम्मू संभाग च महाशिवरात्रि दियां तैआरियां जोरें पर, सरकारै घाटी च नौकरी करा'रदे कश्मीर विस्थापतें लेई 4 दिनें दी विशेष कैयुअल लीव दी मजूरी दित्ती।

<><><><><><>

CM-SAMAGAM

मुख्यमंत्री उमर अब्दुल्ला होरें अंगदान चे महत्व ते ओहूदे बारे लोकें गी जागरूक करने लेई स्वास्थ्य सरबंधी माहिरें गी धार्मिक विद्वाने ते होर दुए सरबंधत धड़ें कन्नै मिलियै अंगदान दे महत्व उप्पर चर्चा गी बढ़ावा देन ते सकारात्मक नतीजें तगर पुज्जने दी जरूरत पर जोर दित्ता। कल श्रीनगर च शेर-ए-कश्मीर अंतर्राष्ट्रीय कनवेंशन केन्द्र च राष्ट्रीय प्रतिअर्पन सरबंधी संगठन नोटो नै रियासती अंग प्रतिअर्पन सरबंधी संगठन सोटो जम्मू दी सांझ भ्याली कन्नै दऊं रोजा समागम 2025 समारोह दा सरिस्ता कीते दा हा। एहूदे उद्घाटनी सत्र गी संबोधत करदे होई कार्यक्रम च मुख्य परौहने मुख्यमंत्री होरें शेर-ए-कश्मीर आर्युविज्ञान संस्थान गौरमेंट मैडिकल कालेज श्रीनगर ते गौरमेंट मैडिकल कालेज जम्मू आस्सेआ अक्खें ते गुर्दा प्रतिअर्पन सरबंधी कम्में दी बड़ी मती सराहना बी कीती।

<><><><><><>

CM-EV Drive

मुख्यमंत्री उमर अब्दुल्ला होरें कल शेर-ए-कश्मीर अंतर्राष्ट्रीय कनवेंशन सेंटर थमां कश्मीर थमां कन्याकुमारी तगर सब्बने शा तेज इलैक्ट्रिक गडिडएं दी मुहिम दे दुए गेड़ गी झंडी दस्सियै रवाना कीता। आयोजकें कन्नै गल्लबात करदे होई मुख्यमंत्री होरें इस मुहिम च हिस्सा लै'रदे सब्बने प्रतियोगिएं दी सराहना कीती। इस दरान मुख्यमंत्रीहोरें इस मुहिम गी भारत दी ई-गडिडएं दे क्षेत्र च आए दे सकारात्मक प्रगति दा प्रमाण गलाया।

मुख्यमंत्री होरें टीम दे जतनें दी सराहना कीती ते मेद प्रगट कीती जे इस बारे पिछले ब'रे दे सब्बे रिकार्ड त्रुट्टी जांगन।

<><><><><><>

LG Address

कैबिनेट नै सोमवार विधानसभा च बजट सत्र दे पैहले दिन उपराज्यपाल मनोज सिन्हा हुंदे अभियान गी मंजूरी देई दित्ती ऐ। आकाशवाणी दे जम्मू संवाददाता नै जापकारी दित्ती ऐ जे जम्मू कश्मीर कैबिनेट नै जंदी संजा सिविल सचिवालय जम्मू च मुख्यमंत्री उमर अब्दुल्ला हुंदी अध्यक्षता च बैठक लाई ते 3 मार्च गी उपराज्यपाल हुंदे आस्सेआ दित्ते जाने आले अभिभाषण लेई मंजूरी देई दित्ती। एह बैठक कल संजा 7 बजे लगी, जेहड़ी 80 मिंटे तगर चली। उपराज्यपाल होरें अपने संबोधन च उमर अब्दुल्ला हुंदे नेतृत्व आली सरकार ते नीतिएं ते रूपरेखा पर खाका पेश करगन। उपराज्यपाल होर 3 मार्च च बडलै 10 बजे सिविल सचिवालय दे विधान परिसर च अपने संबोधन अगले माली ब'रे लेई सरकार दा एजेंडा तैह करगन।

<><><><><><>

PM-KISAN

प्रधानमंत्री किसान सम्मान निधि स्कीम दी 29मीं किश्त कल रियासी रु औपचारिक तौरा पर जारी कीती गई, जेहदे कन्नै करसान समुदाय आर्थिक तौरा पर राहत मसूस कीता। इस मौके उपपर रियासी दे कृषि विज्ञान केन्द्र च इक बड्डे कार्यक्रम दा सरिस्ता कीता गेआ हा जेहदे च बड़ी मती गिनतरी च करसानें हिस्सा लैता ते सरकार प्रति अपना आभार प्रगट कीता। कार्यक्रम च श्री माता वैष्णो देवी कटरा चुनावी हल्के थमां विधायक बलदेव राज शर्मा होरें बी हिस्सा लैता ते करसानें कन्नै गल्लबात कीती। इस मौके उपपर अपनी खुशी जाहर करदे होई इक लाभार्थी करसान नै गलाया।

<><><><><><>

Announcement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 ब'रें दे बश्कार ऐ ते ओह कठुआ जिले दा रौहने आहला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 ब'रें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबबंधत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोड़चदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी

जम्मू पिन कोड 180001 उत्तर 07 मार्च 2025 थावां पैहले-पैहले आइए दस्ती जमा करोआनी होग। इस बारे व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>

Panchayat Election

जम्मू कश्मीर च पंचैत दे चुनां 7एं ब'रे दे वक्फे परैंत औंदे अप्रैल मई म्हीने च होने दी मेद ऐ। आकाशवाणी दे जम्मू संवाददाता नै जानकारी दित्ती ऐ जे प्रदेश चुनां आयोग नै इस भेठा इक महत्वपूर्ण गैह अगड़ी पुट्टदे होई चुनां सरबंधी जरूरी समेयान कठेरना हासल करना शुरू करी दित्ता ऐ जेहड़ा इस गल्लै दी सारत ऐ जे चुनां लेई तैआरियां जोरें-शोरें चलै करदियां न। पंचैती चुनाएं लेई मतदाताएं दियां फाइनल लिस्टां 20 जनवरी गी शाया कीतियां हियां जेहदे परैंत अगड़े गेड़ दिएं कारवाइएं लेई बत्त पदरी होई गई ही। चुनां आयोग कोई 40 ज्हार वोटिंग कम्पाटमेंट जित्थें मत पेटिटएं गी सुरक्षत रखेआ जंदा ऐ ते 64 होर जरूरी आइटमां हासल करने दी प्रक्रिया च ऐ। एहदे लेई ठेका देने दी खीरी तरीक 1 मार्च रखी गई ऐ ते मेद ऐ जे एह समेयान इक म्हीने दे अंदर अंदर सप्लाई बी होई जाग। इआं इस करियै बी तां जे चुनां करोआने कोला पैहले गै प्रशासनिक बवस्था पूरी चाल्ली लैस होई जा।

<><><><><><>

Mahashivratri

केन्द्र शासत प्रदेश दे बाकी हिस्सें आला लेखा उधमपुर जिले च बी महाशिवरात्रि दियां तैआरियां जोरें शोरें चलै करदियां न। जिले दी शिव नगरी खोआने आले चनैनी च बी बड़डे पैमाने पर तैआरियां कीतियां गेदियां न। इस सिलसिले च अज्जै थमां आयोजन शुरू होआ करदे न। बडलै शुरू होई दी कवड़ यात्रा चनैनी दे छोटा अमरनाथ गुफा पुज्जोग, जित्थुआं दपैहरी मगरा त्रिशूल यात्रा कड्डी जाग। मुक्तेश्वर मंदर थमां शुरू होने आली त्रिशूल यात्रा बी छोटा अमरनाथ गुफा तगर जाग। बुधवारें उत्थें सारा दिन भंडारे दा सरिस्ता कीता जाग। एहदे अलावा सुद्धमहादेव, मानतलाई, गौरीकुंड, बानी संगम, मुक्तेश्वर महादेव मंदर, दोशाला मंदर, बाबा बुड्डा केदारनाथ ते कुद्ध दे प्राचीन शिव मंदर च बी कल भंडारा लग्गोग।

<><><><><><>

Casual Leave

सरकारै जम्मू आधारित विस्थापतें ते प्रधानमंत्री हुंदे पैकेज तैहत लग्गे दे मुलाजमें लेई महाशिवरात्रि दे मौके पर 4 दिने दी विशष कैयुअल लीव दी मंजूरी दित्ती ऐ। आकाशवाणी दे जम्मू संवाददाता नै जानकारी दित्ती ऐ इस बारे जारी सरकारी हुक्मै मूजब जम्मू आधारित कश्मीरी विस्थापतें ते कश्मीर घाटी च पीएम पैकेज तैहत नौकरी करा'रदे मलाजमें गी अपने परोआरें कन्नै शिवरात्रि मनाने दा मौका देने लेई एह छुट्टी मंजूर कीती ऐ

जेह्दे मताबक उनेंगी 25 फरवरी मंगलवार, 27 फरवरी वीरवार, 28 फरवरी शुक्रवार ते पैहली मार्च शनिवारें एह कैजुअल लीव लैने दी इजाजत होग।

<><><><><><>

GDC-Kishtwar

सरकारी डिग्री कालेज किश्तवाड़ दे एनसीसी यूनिट, विद्यार्थी कल्याण इकाई ते महिला कल्याण सेल्ल आस्सेआ नमें अपराधिक कनूनें दे बारे च इक जागरूकता कार्यक्रम दा सरिस्ता कीता गेआ। इस पैहल दा मकसद विद्यार्थिएं गी शिक्षित करना ते उनेंगी नमें न्यायिक सुधारें बारे जानकार बनाना हा। जिनें माहिरें विद्यार्थिएं गी नमें अपराधिक कनूनें बारे जानकारी दित्ती, उंदे च डीएसपी पुलस मुखलय इशान शर्मा, सब इंस्पेक्टर मोइन खान ते सब इंस्पेक्टर आशीश नरगोत्रा शामिल हे। जिनें उनेंगी न्याय गी बढ़ावा देने ते जनसुरक्षा गी जकीनी बनाने बारे दस्सेआ दसाया। कार्यक्रम च 200 कोला मते विद्यार्थिएं बड़ी दिलचस्पी कन्नै एह्दे च हिस्सा लैता। कालेज दे महिला विकास सेल्ल दियां कनवीनर डॉ. तबस्सुम सलीम होरें इस बारे जानकारी सांझी करदे होई आखेआ.

<><><><><><>